

# **KONSEP KESEPADUAN PEMERINTAHAN BERAJA BRUNEI DENGAN MELAYU DAN ISLAM**

Asbol Mail  
Fakulti Sastera dan Sains Sosial /  
Akademi pengajian Brunei  
Universiti Brunei Darussalam  
Negara Brunei Darussalam

## **1. PENGENALAN**

Makalah ini cuba menentengahkan konsep kesepaduan pemerintahan beraja Brunei dengan Melayu dan Islam. Kesepaduan secara umumnya bermaksud keadaan yang bersatu padu, menyatu, berpadu, berpakat atau tidak berpecah. Dalam hubungan konsep kesepaduan pula, ia merujuk kepada satu prinsip yang menekankan penyatuan pelbagai unsur atau nilai sehingga membentuk satu suasana yang harmoni hingga ia menjadi semakin kukuh. Dengan yang demikian konsep kesepaduan pemerintahan beraja Brunei dengan nilai-nilai Melayu dan Islam, cuba menentengahkan peranan pemerintahan beraja yang boleh dirujuk kepada kerajaan, kesultanan, sistem beraja mahupun sultan yang sedang memegang tampuk kuasa dalam menyatukannya dengan dua nilai-nilai di atas. Kesepaduan ini pada lazimnya mengarah kepada teretusnya suasana harmoni kepada ketiga-tiga komponen ini yang menjadi landasan kepada falsafah Melayu Islam Beraja Brunei. Dalam perbincangan makalah ini akan melihat konsep kesepaduan beraja dengan nilai Melayu dan Islam dengan mengabungkan kedua-dua komponen Melayu dan Islam. Pergabungan ini dibuat kerana apabila memperkatakan tentang Islam, maka pada kebiasaannya juga membabitkan komponen Melayu. Begitu juga sebaliknya apabila memperkatakan Melayu, maka juga melibatkan Islam, kecuali dalam hal tertentu yang berhubungan dengan masyarakat bukan Islam. Dalam makalah ini konsep kesepaduan beraja Brunei dengan nilai-nilai Melayu dan Islam menumpukan perbincangan kepada aspek-aspek

penyebaran Islam, undang-undang Islam, membina masjid, Perlembagaan 1959, sistem pemerintahan, pendidikan, kebajikan, bahasa Melayu dan adat istiadat. Semua aspek ini diteliti sejak zaman Sultan Muhammad Shah (1363-1402) hingga kini di zaman pemerinthan Kebawah Duli Yang Maha Paduka Seri Baginda Sultan Haji Hassanal Bolkiah Mu'izzaddin Waddaulah.

Kemunculan beraja Brunei sudah pada abad keenam Masihi. Ahli-ahli sejarah yang mengkaji tentang keberadaan pemerintahan beraja di Alam Melayu termasuk Brunei berpendapat bahawa kewujudannya bermula dengan terbentuknya sebuah kampung. Apabila kampung ini mempunyai seorang ketua kampung yang berwibawa dalam kepimpinannya dengan bantuan anak buah kampung, maka kampung ini mengalami kemajuan bukan sahaja dalam nilai-nilai politik tetapi juga sosial dan ekonomi. Senario demikian membolehkan ia untuk meluaskan penguasaannya ke kampung-kampung lain yang berdekatan sehingga wilayah kekuasaan semakin luas dan berkembang. Tahap demi tahap, ketua kampung yang tadi merasa dirinya semakin kukuh dalam kuasa politiknya, lantas mengangkat diri sebagai seorang raja. Dari sinilah lahirnya pemerintahan sistem beraja yang membentuk golongan pemerintah dan golongan diperintah dalam sesebuah kerajaan. Ketua Kampung yang sudah menjadi raja berdaulat lalu membentuk sistem pembesar untuk membantu dalam mentadbir kerajaan yang baru ini. Dari sinilah lahirnya berbagai adat dan peraturan bagi memastikan kedaulatan raja terus terjaga dan negara terus harmoni.

Sistem beraja Brunei sejak lahirnya menganut fahaman animism kemudiannya mengikuti fahaman agama Hindu Buddha. Beraja Brunei terus berkembang maju apabila digambarkan pada abad ke-13 Masihi sebagai negara kaya, gemilang dan mempunyai pasukan tentera laut yang kuat. Agama Hindu Buddha ini tidak selamanya dianuti oleh kerajaan Brunei kerana pada tahun

1368, raja Brunei bernama Awang Alak Betatar telah memeluk agama Islam. Baginda kemudiannya dikenali sebagai Sultan Muhammad Shah (1363-1402). Sejak itulah falsafah Melayu Islam Beraja menjadi tonggak dalam berbangsa dan bernegara bagi Brunei. Sebagai tonggak, maka ia sentiasa wujud dan berkembang apabila beraja Brunei sentiasa menunjukkan kesepaduan dengan kompenan Melayu dan Islam. Kesepaduan ini telah melahirkan nilai-nilai harmoni yang mencetuskan tautan yang teguh kepada tiga kompenan iaitu Melayu Islam Beraja yang menjadi landasan kehidupan berbagai lapisan rakyat.

Kesepaduan antara beraja Brunei dengan Melayu dan Islam ini terus bekesinambungan di era pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan Yang Di-Pertuan Negara Brunei Darussalam (1967-kini). Kesepaduan ini semakin ketara apabila falsafah Melayu Islam Beraja yang lahir secara evolusi sejak zaman pemerintahan Sultan Muhammad Shah telah diisytiharkan pada 1 Januari 1984 oleh Kebawah Duli Yang Maha Mulia. Dengan pengisytiharan ini falsafah Melayu Islam Beraja bukan sekadar ideologi politik tetapi juga sebagai cara hidup orang-orang Brunei yang menyatukan nilai-nilai kebudayaan Melayu, mengamalkan ajaran Islam dan sistem pemerintahan beraja. Oleh itu, melalui dasar-dasar pemerintahan Kebawah Duli Yang Maha Mulia ini, baginda bukan sahaja memastikan falsafah ini kekal dan diamalkan sebagai cara hidup tetapi ia sentiasa dipantuni dan diperkukuhkan dari masa ke semasa biarpun menghadapi berbagai cabaran.

Kesepaduan beraja Brunei dengan nilai-nilai Melayu dan Islam memang sudah berlaku sejak baginda menaiki takhta pada tahun 1967. Kebawah Duli Yang Maha Mulia sebagai pemimpin

tertinggi negara sentiasa menunjukkan komitmen dalam menyatukan nilai-nilai Melayu dan Islam dalam wacana bernegara dan berbangsa.

Berbagai langkah telah diambil oleh baginda dalam mensepadukan elemen Melayu dan Islam dengan pemerintahan beraja Brunei dalam berbagai bidang kehidupan rakyat Brunei agar kehidupan mereka terus sejahtera sampai bila-bila juga. Kehidupan yang harmoni penting bagi mencapai matlamat pembangunan negara dan seterusnya ke arah merealisasikan Wawasan 2035 (Asbol Mail dan Ramlee Haji Tinkong, 2023).

Sungguhpun falsafah Melayu Islam Beraja baru diisytiharkan semasa pencapaian kemerdekaan Brunei, namun jejak-jejak kewujudan falsafah ini boleh dikesan sejak abad ke-14 Masihi. Hal ini berlaku apabila Awang Alak Betatar, raja Brunei ketika itu telah memeluk agama Islam pada tahun 1368 seperti dijelaskan di atas. Peristiwa ini berlaku apabila baginda berkahwin dengan puteri Johor atau Singapura Tua. Dengan pengislaman baginda inilah boleh dianggap sebagai permulaan kepada terbentuknya falsafah Melayu Islam Brunei bagi Brunei. Hal ini berlaku apabila munculnya elemen Melayu, Islam dan beraja yang bergabung sebagai falsafah negara sebaik-baik saja Awang Alak Betatar memeluk agama Islam. Gabungan ini boleh dikesan apabila Awang Alak Betatar dan rakyatnya berbangsa Melayu yang awalnya dipercayai menganut agama Hindu Buddha telah mengambil keputusan untuk menjadi umat Islam. Sementara itu Awang Alak Betatar telah menjadi raja Brunei pertama memeluk beragama Islam hingga melahirkan sebuah Kesultanan Melayu Brunei yang berteraskan falsafah Melayu Islam Beraja. Langkah baginda memeluk agama Islam ini juga merupakan satu jasa besar yang baginda

tabur kerana telah berjaya membawa rakyat Brunei menganut agama yang benar yang menjanjikan kebahagiaan hidup dunia dan akhirat.

Dengan yang demikian sultan-sultan Brunei hingga ke zaman pemerintahan Kebawah Duli Yang Maha setelah pemerintahan Sultan Muhammad Shah berakhir, mereka terus menggalas tanggungjawab dalam mengamalkan dan mengukuhkan falsafah Melayu Islam Beraja dengan mengambil langkah menyatukan antara pemerintahan beraja dengan Melayu dan Islam (Asbol Mail dan Ramlee Haji Tinkong, 2023).

## **2. MELAYU**

Falsafah Melayu Islam Beraja terdiri daripada tiga komponen penting iaitu Melayu, Islam dan Beraja. Makna Melayu telah dicerkinkan semasa pengisytiharan Perlembagaan Negeri Brunei pada tahun 1959 bermaksud hak bangsa Melayu yang terdiri daripada tujuh puak jati bangsa Melayu iaitu Brunei, Belait, Kedayan, Tutong, Dusun, Bisaya dan Murut (*Melayu Islam Beraja: Evolusi dan Pendidikan*, 2024). Ini menunjukkan bahawa bangsa Melayu Brunei tidak semestinya terdiri dari masyarakat yang beragama Islam tetapi juga termasuk sebahagian daripada etnik-etnik yang bukan beragama Islam (Tassim bin Haji Abu Bakar, 2015; Asbol Mail dan Ramlee Haji Tinkong, 2023). Melalui Perlembagaan Negeri Brunei 1959 ini juga telah diperakui bahasa Melayu dan agama Islam telah menjadi bahasa dan agama rasmi negara.

Sementara Islam sebagai agama rasmi negara menurut akidah Ahli Sunnah Wal Jamaah sebenarnya telah muncul di bumi Negara Brunei Darussalam yang bertuah ini sebelum lagi Awang Alak Betatar memeluk Islam. (Asbol Mail dan Ramlee Haji Tinkong, 2023). Islam sudah

sampai pada abad ke-10 Masihi berdasarkan sumber China yang mencatatkan bahawa pada tahun 977, raja Po-ni telah menghantar utusan ke China yang diketuai oleh Pu Ya-Li (Abu Ali), Shih Nu (Sheikh Noh) dan Qadhi Kasim. Melalui nama-nama ini jelas mereka ini adalah orang beragama Islam. Orang-orang Islam terutama dari Arab Parsi yang datang ke Brunei sebelum abad ke-14 dengan tujuan berdagang telah mengambil kesempatan menyebarkan Islam. Ini menjadikan sebahagian daripada penduduk Brunei berjaya diislamkan, bagaimanapun pada ketika itu raja Brunei belum memeluk agama ini. (*Melayu Islam Beraja: Amanat 1984*, 2020). Apabila Awang Alak Betatar memeluk Islam, maka perkembangan agama Islam semakin pesat apabila para pembesar dan rakyat Brunei juga turut mengikuti jejak langkah baginda. (Asbol Mail et al, 2019)

### **3. BERAJA**

Manakala beraja merupakan salah satu komponen penting dalam falsafah Melayu Islam Beraja. Beraja adalah sistem pemerintahan yang berteraskan institusi raja yang perlu memerintah secara mutlak dan adil. Takhta raja akan terus diwarisi oleh putera gahara dari masa ke semasa selagi pemerintahan beraja ini wujud. Dalam hieraki pemerintahan, sultan berada di kedudukan teratas yang memiliki kuasa dan keistimewaan segenap bidang. Dengan kedudukan yang demikian, maka sultan adalah tunggak kepada negara dimana rakyat harus taat setia kepada baginda. Semangat taat ini telah menjadi satu amalan yang sudah berakar umbi dalam beraja Brunei. Dengan ketaatsetiaan kepada sultan, maka sultan mempunyai daulat dan kuasa untuk melaksanakan pemerintahan berlandaskan kanun, syarak, resam dan adat istiadat. Bagaimanapun, sultan dalam melaksanakan pemerintahan dikehendaki adil dan tidak berlaku

zalim ke atas rakyatnya (Badaruddin Othman, 2022; Asbol Mail dan Ramlee Haji Tingkong, 2023).

#### **4. MENYEBARKAN ISLAM**

Dalam meneliti kesepaduan antara beraja Brunei dengan nilai-nilai Melayu dan Islam, maka dengan adanya kuasa politik di tangan sultan membolehkan baginda untuk menyebarkan syiar Islam. Selepas kemangkatan Sultan Muhammad Shah, Islam sebagai salah satu komponen falsafah Melayu Islam Beraja terus bersepadu di zaman pemerintahan Sultan Sharif Ali (1425-1432). Baginda merupakan Sultan Brunei yang ketiga berasal dari Taif berketurunan Rasulullah telah berjaya memantapkan perkembangan Islam Brunei. Apabila Islam berjaya dimantapkan, maka dengan sendiri ia juga mengukuhkan akidah dan pegangan orang-orang Melayu ke atas Islam. Baginda telah memperkenalkan Undang-Undang Islam ke atas rakyat Brunei, melarang memakan babi dan menentukan arah qiblat. Sultan Sharif Ali juga telah membina masjid. Terbinanya Rumah Allah ini telah menggambarkan semakin ramainya rakyat Brunei yang memeluk Islam. Masjid bukan sahaja tempat beribadat tetapi juga tempat kegiatan dakwah dan pendidikan. Dalam masa yang sama pemerintahan beraja Brunei pada ketika juga bersepadu dengan Melayu apabila dakwah dan pendidikan disampaikan dalam bahasa Melayu. Ini menjadikan penggunaan bahasa Melayu dalam tempoh ini semakin berkembang dalam ranah keagamaan.

Kesepaduan antara beraja Brunei dengan Islam terus kukuh dan berkembang seiring dengan pencapaian gemilang di era pemerintahan Sultan Bolkiah (1485-1524 Masihi) dan Sultan Muhammad Hasan (1582-1598 Masihi). Kedua-dua baginda telah berjaya mengukuhkan Islam

dan sekaligus Melayu apabila kuasa politik beraja Brunei berjaya dijulung dengan dasar peluasan jajahan takluknya yang meliputi pulau Borneo dan bahagian utara Kepulauan Filipina. (Sabihah Osman et al, 1995: Jamil Al-Sufri, 1997). Dengan peluasan wilayah ini jelas telah mengukuhkan Islam. Perkara ini berlaku apabila pemerintahan beraja Brunei dengan bantuan para pendakwah telah berjaya menyebarkan Islam dengan lebih meluas ke atas wilayah-wilayah yang dikuasai Brunei. Dalam gerakan Islam yang semakin pesat ini, maka dengan sendirinya penggunaan bahasa Melayu semakin berkembang luas kerana ia digunakan dalam gerakan ini.

## **5. CABARAN DAN KEBANGKITAN KESEPADUAN**

Kesan dari kesepaduan antara beraja Brunei dengan Melayu dan Islam ini boleh dilihat semasa pemerintahan Sultan Saiful Rijal (1533-1581 Masihi), apabila baginda berjaya menyelamatkan Melayu dan Islam daripada cabaran kuasa Sepanyol yang mahu menguasai Brunei dan menyebarkan agama Kristian (Asbol Mail dan Ramlee Haji Tinkong, 2023). Orang-orang Sepanyol yang berjaya menduduki Brunei setelah berjaya menewaskan tentera Brunei dalam Perang Kastila pada tahun 1579. Bagaimanapun mereka hanya dapat bertahan di Brunei selama 72 hari setelah diserang balas oleh tentera Brunei.

Bagaimanapun pada abad ke-19 cabaran ke atas kesepaduan antara beraja Brunei dengan Melayu dan Islam datang lagi dari kuasa Barat yang dipelopori oleh British. Hambatan yang dibawa oleh British ini semakin kuat berbanding dengan kuasa Sepanyol sebelumnya. Kuasa ini telah berjaya menguasai beraja Brunei, maka dalam masa yang sama juga turut mengugat nilai-



nilai Melayu dan Islam. Hal berlaku apabila wilayah Brunei dari Tanjung Datu Sarawak hingga ke Sabah telah berhasil dibulut oleh kuasa Barat ini.

Perjanjian tambahan 1906 yang ditanda tangani oleh Sultan Hashim (1885-1906) dengan kerajaan British telah berjaya mempertahankan kesepaduan beraja Brunei dengan Melayu dan Islam. Ia satu kejayaan besar, sungguhpun peranan Melayu dan Islam semakin disempitkan seiring dengan kemerosotan wilayah Brunei pada ketika itu. Kesepaduan beraja Brunei dengan Melayu dan Islam terus mendapat pukulan apabila ia dikuasai oleh tentera Jepun dari tahun 1941 hingga 1945 dalam peristiwa Perang Dunia Kedua.

Kesepaduan antara beraja dengan Melayu dan Islam semakin bangkit dan berkembang secara berfasa apabila tampuk pemerintahan dipegang oleh Sultan Omar Ali Saifuddien Saádul Khairi Waddien (1950-1967). Hal ini berlaku apabila Perlembagaan Negeri Brunei 1959 telah dimeterai dengan kerajaan British. Melalui perlembagaan ini kesepaduan beraja Brunei dengan Melayu dan Islam semakin kukuh. Dengan adanya perlembagaan ini, maka kuasa Residen British dalam pentadbiran Brunei sejak tahun 1906 telah ditiadakan. Sementara itu agama Islam diangkat sebagai agama rasmi negara dan bahasa Melayu sebagai bahasa rasmi negara sebagaimana dijelaskan di atas. Ini diteruskan sehingga pemerintahan Kebawah Duli Yang Maha Mulia apabila falsafah ini terus dijulang dengan pegangan teguh kepada agama Islam dalam apa juga urusan pentadbiran dan kehidupan rakyat di Negara Brunei Darussalam (Asbol Mail dan Ramlee Haji Tinkong, 2023).

## **6. KESEPADUAN DI ZAMAN KEBAWAH DULI YANG MAHA MULIA**

Kebawah Duli Yang Maha Mulia Paduka Seri Baginda Sultan merupakan seorang pemimpin Negara Brunei yang berjasa besar mengukuhkan kesepaduan pemerintahan beraja dengan Melayu dan Islam dalam ranah politik, sosial dan ekonomi sejak tahun 1967 hingga kini. Baginda sebagai raja dalam mengukuhkan perpaduan dengan Melayu dan Islam telah dilakukan menerusi sistem pemerintahan, aspek agama Islam, pendidikan, kebajikan, bahasa Melayu dan adat istiadat.

### **6.1 SISTEM PEMERINTAHAN**

Kebawah Duli Yang Maha Mulia Paduka Seri Baginda Sultan memainkan peranan yang komprehensif dalam mengukuhkan perpaduan elemen Melayu dan Islam dengan beraja Brunei. Hal ini berlaku apabila falsafah Melayu Islam Beraja diisytiharkan secara rasmi sebagai pegangan berbangsa dan bernegara bagi Negara Brunei Darussalam semasa pencapaian kemerdekaan sebagaimana titah baginda ketika Pemashyuran Kemerdekaan (Asbol Mail dan Ramlee Haji Tingkong, 2023):

“...Negara Brunei Darussalam adalah dengan izin serta limpah kurnia Allah

Subhanahu Wa Taala untuk selamanya kekal menjadi sebuah Negara Melayu Islam Beraja yang Merdeka, Berdaulat dan bersendikan ajaran Islam menurut Ahli Sunnah Waljamaah dan dengan berasaskan keadilan, amanah dan petunjuk serta keredaan Allah Subhanahu Wata'ala jua akan sentiasa berusaha pada memperolehi ketenteraman dan keselamatan, kebajikan dan kebahagiaan bagi rakyat beta...”

Dengan pengisytiharan ini, adalah jasa besar Kebawah Duli Yang Maha Mulia apabila falsafah ini semakin terdedah dan difahami oleh setiap lapisan rakyat Negara Brunei Darussalam. Tanpa pengisytiharan ini orang Brunei tidak tahu bahawa selama ini negara ini adalah negara berfalsafahkan Melayu Islam Beraja. Ia telah menarik minat kepada para sarjana untuk membuktikan bahawa apa yang disytiharkan oleh Kebawah Duli Yang Maha Mulia ini bukan retorik tetapi kenyataan berdasarkan bukti dari fakta-fakta sejarah. Kesepaduan beraja Brunei dengan elemen Melayu Islam terus diperkukuhkan apabila Kebawah Duli Yang Maha Mulia terus mengekalkan sistem pemerintahan beraja mutlak (*absolute monarchy*) di mana baginda memegang kuasa penuh sebagai ketua kerajaan dan ketua agama Islam. Kepimpinan baginda berlandaskan falsafah ini bertujuan untuk penyatuan bangsa yang berpaksi kepada ajaran Islam yang boleh membawa kepada kestabilan politik dan pentadbiran negara yang boleh membawa kehidupan rakyat ke arah yang lebih baik dan sejahtera.

Kesepaduan beraja Brunei dengan Melayu dan Islam ditunjukkan melalui keseimbangan pemerintahan antara tradisi dan moden. Walaupun berasaskan sistem monarki mutlak, akan tetapi pentadbiran negara tetap responsif kepada keperluan Melayu dan Islam melalui institusi-institusi seperti Majlis Mesyuarat Negara, Menteri-Menteri Kabinet dan agensi-agensi kerajaan. Ketika pemerintahan baginda ini, rancangan pembangunan sosio-ekonomi negara diimplementasikan dengan matlamat utama memberikan kesejahteraan kepada rakyat Brunei. Penduduk negara ini

terbukti telah dapat menikmati pendidikan dan perubatan percuma dari pihak kerajaan di samping tanpa dikenakan sebarang cukai seperti cukai pendapatan (Asbol Mail dan Ramlee Haji Tinkong, 2023).

Perubatan percuma tidak hanya menyediakan hospital dan klinik tetapi juga kerajaan sanggup membiayai bagi warganegara Brunei untuk menjalani rawatan di luar negara khususnya mereka yang menghidap penyakit kronik seperti jantung dan kanser. Begitu juga rancangan perumahan negara yang dilaksanakan oleh kerajaan dengan bayaran pulangan dengan harga yang terendah. Ia dilakukan semata-mata bagi membolehkan perumahan ini mampu dimiliki golongan berpendapatan rendah. Begitu juga orang-orang berkeperluan sentiasa dipeduli dan mendapat bantuan yang berpatutan dari pihak kerajaan. Dalam keadaan yang demikian telah menunjukkan bahawa kesepaduan pemerintahan beraja dengan Melayu begitu menonjol apabila pembangunan yang dibuat oleh kerajaan dinikmati oleh bangsa Melayu sebagai penduduk majoriti Brunei. Pembangunan demikian memang dianjurkan oleh ajaran Islam.

Kebawah Duli Yang Maha Mulia sentiasa menekankan perlunya pemerintahan beraja sentiasa diikat erat dengan nilai-nilai Melayu dan Islam dalam menjaga kestabilan politik dan kedaulatan negara. Ini dapat dilihat dalam titah-titah baginda semasa Sambutan Hari Kebangsaan, Hari Keputeraan dan Majlis Ilmu sering mengingatkan kepada rakyat supaya terus sama-sama memelihara semangat kesetiaan kepada raja, menghormati undang-undang dan mengamalkan ajaran Islam dalam semua aspek kehidupan.

## **6.2 KESEPADUAN DAN KEBAJIKAN**

Peranan Kebawah Duli Yang Maha Mulia dalam mengukuhkan kesepaduan antara pemerintahan beraja dengan Melayu dan Islam boleh dilihat dari aspek pempulian kebajikan rakyat yang memerlukan. Dalam hubungan ini berlaku dengan penubuhan Yayasan Sultan Haji Hassanal Bolkiah, yang menjadi medium penting dalam memperjuangkan kebajikan rakyat sejajar dengan prinsip-prinsip Islam dan nilai-nilai Melayu yang tidak camah mata ke atas mereka yang memerlukannya.

Yayasan Sultan Haji Hassanal Bolkiah ditubuhkan pada 5 Oktober 1992 bagi membantu golongan yang memerlukan dari segi kewangan, perumahan, pendidikan dan perubatan. Ia juga bagi meningkatkan taraf hidup rakyat dengan menyediakan pelbagai program bantuan bersifat jangka pendek dan jangka panjang serta menyokong pembangunan modal insan selaras dengan nilai-nilai Islam dan kemelayuan. Dalam bidang keagamaan, Yayasan Sultan Haji Hassanal Bolkiah telah menyediakan biasiswa agama untuk memberikan bantuan kewangan bagi tujuan pendidikan agama kepada pelajar cemerlang dan kurang berkemampuan untuk melanjutkan pelajaran dalam dan luar negara. Ini menyumbang kepada pembangunan intelektual negara berasaskan nilai-nilai Islam yang didominasi oleh anak-anak Melayu. Melalui Yayasan ini, baginda tidak hanya mengulurkan bantuan kepada rakyat yang memerlukan yang tentunya majoriti berbangsa Melayu tetapi turut menghulurkan sokongan kewangan bagi kegiatan dalam mengembangmajukan syiar Islam yang boleh mendatangkan manfaat kepada negara (Asbol Mail, 2018; Asbol Mail dan Ramlee Haji Tinkong, 2023)). Hal ini boleh dilihat apabila ia sentiasa memberikan mendokong kegiatan keagamaan seperti yang dilakukan di masjid-masjid dan

kegiatan dakwah. Senario ini telah memperkukuh lagi kesepaduan pemerintahan beraja Brunei dengan Melayu dan Islam.

## 7. KESEPADUAN BAHASA MELAYU DAN ADAT ISTIADAT

Dalam mengukuhkan kesepaduan antara pemerintahan beraja dengan Melayu dan Islam, Kebawah Duli Yang Maha Mulia amat menitikberatkan dalam mengekalkan warisan Melayu yang telah menjadi identiti kepada rakyat Brunei. Antaranya ialah mempertahankan bahasa Melayu dan adat istiadat. Meneruskan bahasa Melayu sebagai bahasa rasmi setelah menaiki takhta telah menunjukkan bahawa Kebawah Duli Yang Maha Mulia amat prihatin dalam menjaga masa depan bahasa ini sungguhpun menghadapi saingan dari berbagai bahasa asing terutama bahasa Inggeris. (Fatimah Husain, 2000).

Menerusi agensi seperti Dewan Bahasa dan Pustaka, Pusat Sejarah Brunei dan Kementerian Kebudayaan Belia dan Sukan, maka pelbagai program telah dilaksanakan untuk memperkukuhkan penguasaan bahasa Melayu dalam kalangan rakyat Brunei terutama generasi muda. Antaranya mengadakan aktiviti Bulan Bahasa, Festival Kebudayaan Melayu dan Pesta Buku yang merupakan langkah dalam melestarikan bahasa dan budaya.

Sementara itu Dewan Bahasa dan Pustaka pula berperanan dalam memastikan agar bahasa Melayu didaulatkan dengan penggunaannya bukan saja di jabatan-jabatan kerajaan tetapi di mana saja di Negara Brunei Darussalam tanpa mengira rupa bangsa. Dewan Bahasa dan Pustaka berperanan untuk mengembangkan bahasa Melayu melalui berbagai strategi seperti mengadakan

rancangan pengembangan bahasa dengan aktiviti penerbitan buku, kamus, jurnal dan majalah. (Fatimah Husain, 2000). Dalam mengembangkan dan memajukan penggunaan bahasa Melayu di peringkat serantau, Dewan Bahasa dan Pustaka juga telah mengadakan jaringan kerjasama dengan Malaysia dan Indonesia.

Selain bahasa Melayu, Kebawah Duli Yang Maha Mulia juga mahu supaya adat istiadat Melayu dipertahankan dari masa kesemasa biarpun Brunei sentiasa berhadapan dengan arus permodenan. Kebawah Duli Yang Maha Mulia sentiasa menekankan bahawa adat bukan sekadar warisan, tetapi sebahagian daripada jati diri negara yang harus dipelihara dan diamalkan dalam kehidupan moden. Menerusi pemerintahan beraja ini, maka di bawah kuasa Kebawah Duli Yang Maha Mulia terus memainkan peranan sebagai pelindung adat istiadat yang memang perlu ada persepaduan dengan kompenan Melayu. Adat istiadat Melayu terus bertahan dan wujud di era pemerintahan Kebawah Duli Yang Maha apabila majlis-majlis rasmi negara masih mengekalkan struktur istiadat Melayu yang lengkap, termasuk dalam berpakaian, berbahasa dan susun lapis orang-orang disampiri gelaran yang berasaskan sistem tradisional. Dalam memartabatkan adat istiadat Melayu, baginda telah mengambil langkah memperkasakan Majlis Adat Istiadat Negara dengan mengawal selia dan memperkenalkan semula adat-adat rasmi diraja dan negara seperti istiadat pertabalan, perkahwinan diraja, perlantikan jawatan tinggi, pengurniaan bintang dan pingat, mengurniakan gelaran dan sambutan hari-hari kebesaran negara.

### 6.3 KESEPADUAN DAN AGAMA ISLAM

Kesepaduan dengan Melayu dan Islam di bawa pemerintahan Kebawah Duli Yang Maha Mulia berlaku apabila baginda bertindak memartabatkan undang-undang Islam di Negara Brunei Darussalam khususnya undang-undang jenayah syariah (Asbol Mail dan Ramlee Haji Tinkong, 2023). Baginda telah pun merancang untuk mengwujudkan undang-undang Islam ini sejak tahun 1980 lagi. Langkah selanjutnya apabila baginda telah memperkenankan penubuhan sebuah jawatankuasa dikenali sebagai Jawatankuasa Mensesuaikan Undang-Undang Dengan Kehendak Ugama (Yahya Haji Ibrahim, 2011)

Baginda juga sentiasa melihatkan komitmen bagi undang-undang di Negara Brunei Darussalam bersesuaian dengan kehendak hukum syariah, sebagaimana dalam titah baginda pada tahun 1996 apabila baginda memperkenankan penubuhan Mahkamah-Mahkamah Syariah dengan mempunyai bidang kuasa yang luas dengan tidak hanya sahaja tertumpu kepada pentadbiran undang-undang keluarga tetapi juga kepada undang-undang jenayah Islam di Negara Brunei Darussalam. Dalam hal ini baginda mahu mengwujudkan *Islamic Criminal Act* atau Qanun Jina'i Islam sebagaimana yang dituntut oleh Allah yang termaktub dalam kitab suci Al Quran. (Zainon Haji Mohd Tahir, 2016; Asbol Mail dan Ramlee Haji Tinkong, 2023)

Perlaksanaan Perintah Kanun Hukuman Jenayah Syariah ini telah diluluskan pda 15 Julai 2012 dan dilaksanakan di Negara Brunei Darussalam (Hanan Aziz, 2018). Dengan perlaksanaan undang-undang ini menunjukkan bahawa kesepaduan pemerintahan beraja Brunei dengan Islam apabila undang-undang Islam telah dijulung tinggi kembali setelah merundum sejak pentadbiran Residen British pada tahun 1906. Kerajaan Kebawah Duli Yang Maha Mulia telah



menggazetkan Akta Perintah Kanun Hukuman Jenayah Syariah pada 22 Oktober 2013 dan berkuatkuasa enam bulan selepas digazetkan secara berfasa (Zainon Haji Mohd Tahir, 2016; Hanan Aziz, 2018; Asbol Mail dan Ramlee Haji Tinkong, 2023) seperti berikut:

**Fasa Pertama** : Peruntukan-peruntukan bagi semua Kesalahan Am dalam Bahagian IV Penggal IV yang membawa kepada hukuman denda dan penjara dilaksanakan seperti kegagalan dalam menunaikan sembahyang Jumaat dan tidak menghormati bulan Ramadhan.

**Fasa Kedua** : Dijangka berkuatkuasa 12 bulan dari tarikh Perintah Kanun Peraturan Jenayah Mahkamah Syariah digazetkan. Ini merangkumi bagi kesalahan-kesalahan dalam Bahagian IV Penggal I, II dan III yang boleh dikenakan hukuman Hadd, Qisas, Diyat, Badal Al-Sulh atau Arsy kecuali kesalahan yang membawa kepada hukuman mati.

**Fasa Ketiga** : Berkuatkuasa 24 bulan selepas tarikh Perintah Kanun Peraturan Jenayah Mahkamah Syariah digazetkan. Dalam fasa ketiga ini Perintah Kanun Peraturan Jenayah Mahkamah Syariah dikuatkuasakan sepenuhnya termasuk perlaksanaan hukuman mati.

Penguatkuasaan fasa pertama telah dilaksanakan pada 1 Mei 2014 (Asbol Mail dan Ramlee Haji Tinkong, 2023). Maka bermula dari tarikh tersebut maka Negara Brunei Darussalam telah melaksanakan dua sistem perundangan iaitu syariah dan sivil secara serentak. Melalui undang-undang Islam ini akan dapat mengurangkan jenayah selain kehidupan lebih terjamin dari sebarang kekacauan disebabkan faktor jenayah.

Kesepaduan pemerintahan beraja dengan Islam di bawah pemerintahan Kebawah Duli Yang Maha Mulia diperkemaskinikan lagi dengan menjadikan Negara Brunei Darussalam sebagai Negara Zikir. Konsep ini telah dizahirkan oleh Kebawah Duli Yang Maha Mulia melalui titah baginda pada tahun 2007 sempena Hari Raya Aidiladha seperti berikut (Umami Fai'izah Abdul Rahman, 2020):

“Beta, Insya Allah akan terus untuk menjadikan Brunei Darussalam sebuah ‘Negara Zikir’ yang sentiasa mengagungkan Allah, supaya kita selalu berada dalam perhatian dan pemeliharaan-Nya sesuai dengan janji-Nya di dalam surah al-Baqarah ayat 152, tafsirnya “Kamu ingati Aku, nescaya Aku akan mengingati kamu pula”

Dengan terbentuknya Negara Zikir ini Kebawah Duli Yang Maha Mulia yakin bahawa rakyat Brunei akan sentiasa berpegang teguh kepada ajaran-ajaran Islam. Dengan berlandaskan Negara Zikir, maka rakyat Brunei diharapkan sentiasa mengingati Allah dalam apa jua kegiatan baik di masa senang mahupun di masa susah. Senario seperti ini sudah pasti mengundang keberkatan, pertolongan dan rahmat Allah Negara Brunei Darussalam. Pembentukan Negara Zikir menyebabkan falsafah Melayu Islam Beraja semakin kukuh apabila ia wujud dalam bentuk amalan dan spiritual.

Peranan Kebawah Duli Yang Maha Mulia sebagai pemimpin tertinggi pemerintahan beraja Brunei dalam menyatukan dengan Melayu dan Islam apabila kedua-dua komponen ini diserapkan dalam ranah sosioekonomi rakyat Brunei. (Asbol Mail dan Ramlee Haji Tinkong, 2023). Hal ini telah dilakukan apabila Kebawah Duli Yang Maha Mulia telah mengambil langkah untuk mengharamkan kemasukan minuman keras ke negara ini dengan dimulakan pengharaman untuk menghidangkan arak di dalam Penerbangan Diraja Brunei pada 30

November 1988. Pada 31 Julai 1990, pengharaman ini dilaratkan ke kelab-kelab Angkatan Bersenjata Diraja Brunei dan Pasukan Polis Diraja Brunei. Selepas itu barulah pengharaman kemasukan arak ini dikuatkuasakan pada 1 Disember 1991 (Ummi Amnah Haji Hirmond dan Abdurrahman Raden Aji Haqqi, 2020; Asbol Mail dan Ramlee Haji Tinkong, 2023). Arak adalah minuman yang mendatangkan mudarat kepada penggunaanya. Hal terbukti apabila minuman ini diminum dalam kadar yang banyak, penggunaanya menjadi mabuk dan hilang akal. Bahkan dalam kes-kes tertentu yang berlaku di luar negara pengguna arak ini ada yang terkorban apabila meminumnya dalam kadar yang berlebihan. Keburukan meminum arak ini semakin merbahaya apabila peminum yang sedang mabuk memandu kereta. Ia sudah pasti akan mendatangkan kecelakaan di jalan raya. Apabila ini berlaku, ia tidak hanya membabitkan peminumnya tetapi juga penggunaan lain yang tidak berdosa.

Sementara itu, bagi mencegah berlakunya maksiat dan keruntuhan akhlak, kelab-kelab malam juga ditegah untuk dibuka di Negara Brunei Darussalam (Siti Sara Haji Ahmad, 2021). Apabila kelab-kelab malam dibenarkan tiga gejala negatif pasti berlaku iaitu penggunaan dadah, pelacuran dan minum arak. Semua ini boleh mendatangkan huruhara kepada kehidupan masyarakat.

#### **6.4 KESEPADUAN DAN EKONOMI ISLAM**

Kesepaduan nilai-nilai Melayu dan Islam dengan pemerintahan beraja di zaman pemerintahan Kebawah Duli Yang Maha Mulia tidak hanya berlaku dalam bentuk undang-undang tetapi juga dilaksanakan dalam kegiatan ekonomi dengan menekankan penggunaan ekonomi Islam dalam kegiatan perbankan dan kewangan Islam. Sejak tahun 1980an, pelbagai pihak telah

menyuarakan perlunya ditubuhkan perbankan dan kewangan Islam bagi mengelakkan unsur riba dalam kegiatannya. Riba memang diharamkan dalam ajaran Islam kerana ia bentuk penindasan dalam proses jual beli. Dengan yang demikian baginda telah merespon mengenai hal ini sebagaimana dalam titah baginda pada 25 September 1990 (Roselan Haji Daud, 2004) iaitu:

“Umpamanya sebagai contoh, satu perkara yang berhubung dengan sistem kewangan Islam, yang sangat popular hari ini ialah Bank Islam. Ianya bukanlah satu lagi impian atau angan-angan, tetapi khabar-khabarnya sudah terdapat 50 buah Bank Perdagangan Islam di negara-negara Islam pada masa ini. Pada hemat beta, ini juga merupakan salah satu daripada kewajipan fardhu kifayah bagi tiap-tiap negara dan negara kita Brunei Darussalam adalah tidak terkecuali”

Oleh itu pada 29 September 1991, Tabung Amanah Islam Brunei (TAIB) telah ditubuhkan. Dengan penubuhan Tabung Amanah Islam Brunei ini menunjukkan kesungguhan Kebawah Duli Yang Maha Mulia dan kerajaan Brunei untuk melaksanakan sistem kewangan berdasarkan kehendak agama Islam dan hukum syarak. Penubuhan Tabung Amanah Islam Brunei in menjadikan perbankan atau kewangan Islam pertama di Negara Brunei Darussalam. Setelah itu diikuti dengan penubuhan Bank Islam Brunei Berhad (IBB) dan Syarikat Insurans Islam (Takaful Islam IBB) yang dilancarkan pada 13 Januari 1993 (Asbol Mail dan Ramlee Haji Tinkong, 2023). Penubuhan Bank Islam Brunei Berhad menjadikan buat pertama kali Negara Brunei Darussalam mempunyai bank yang melaksanakan muamalah mengikut syariat Islam.

Pada Februari 2006, Bank Islam Brunei Berhad telah digabungkan dengan Bank Pembangunan Islam Brunei Berhad dan dikenali sebagai Bank Islam Brunei Darussalam (BIBD). Jelasnya sehingga kini, Bank Islam Brunei Darussalam telah menjadi institusi Islam terbesar di Brunei dengan menyediakan pelbagai perkhidmatan transaksi kewangan dan komersial mengikut

prinsip Islam (Asbol Mail dan Ramlee Haji Tinkong, 2023). Ia adalah hasil peranan Kebawah Duli Yang Maha Mulia dalam menyatukan nilai Melayu dan Islam dengan pemerintahan beraja Brunei.

Dalam langkah menyatukan antara Melayu dan Islam dengan pemerintahan beraja di bawah kepimpinan Kebawah Duli Yang Maha Mulia, maka baginda berkenan melaksanakan arahan penutupan premis-premis perniagaan sewaktu sembahyang Fardhu Jumaat. Kesemua premis-premis perniagaan hendaklah menutup perniagaan mereka bermula pada jam 12 tengahari sehingga pukul dua petang. Penutupan premis ini bagi memastikan syiar agama Islam terpelihara dan diamalkan sejajar dengan falsafah negara Melayu Islam Beraja. Penutupan ini termasuk premis pejabat, pasar, tamu atau gerai dan gedung-gedung perniagaan. Arahan yang dikuatkuasakan ini menunjukkan kesungguhan baginda dalam menyatukan syariat Islam dan Melayu dengan pemerintahan beraja yang membawa kepada pengukuhan falsafah Melayu Islam Beraja dalam bentuk nyata dan praktikal.

## **6.5 PENDIDIKAN ISLAM**

Kesepaduan antara nilai Melayu dan Islam di bawah pemerintahan Kebawah Duli Yang Maha terus subur yang bukan sahaja berlaku melalui penguatkuasaan Undang-undang Islam dan ekonomi Islam tetapi juga melalui kemajuan pendidikan Islam yang terus diberi keutamaan di era pentadbiran Kebawah Duli Yang Maha Mulia.

Baginda berperanan meneruskan legasi ayahanda baginda menyambung kemunculan sekolah agama agar ajaran-ajaran Islam dapat disemai dalam kehidupan pelajar dan juga masyarakat umum secara keseluruhannya. Peranan baginda dalam hal ini boleh disaksikan dengan kemajuan yang ketara dari segi pendidikan Islam apabila bilangan sekolah agama di negara ini telah mencapai ke tahap ratusan buah sekolah seluruh negara. Hal ini boleh dilihat pada tahun 2017 terdapat 143 buah sekolah agama di seluruh negeri dan tujuh buah sekolah Arab. Ini adalah ekoran jumlah pelajar yang semakin bertambah ramai yang menghadiri persekolahan agama sejak penubuhannya pada tahun 1956 (Dk Norafidah et.al, 2024).

Oleh kerana keramaian pelajar yang mahu memasuki sekolah agama semakin bertambah dari tahun ke tahun, maka pada tahun 1976, peruntukan khas disediakan untuk membina lebih banyak bangunan sekolah-sekolah agama melalui peruntukan rancangan kemajuan negara. Semenjak itu, terbinalah bangunan sekolah-sekolah agama di pekan-pekan dan kampung-kampung, mengikut keperluan setempat dalam bentuk yang bersesuaian. Setiap bangunan sekolah agama ini dilengkapi dengan fasiliti tempat wudhu dan juga dewan untuk kemudahan para pelajar dan guru untuk menunaikan sembahyang fardhu Zohor dan Asar secara berjemaah (Abdul Hamid Mohd Daud, 2014).

Peranan Kebawah Duli Yang Maha Mulia dalam memartabatkan pendidikan agama Islam semakin menonjol apabila baginda mengisytiharkan Perintah Pendidikan Agama Wajib 2012 yang mula berkuatkuasa pada 1 Januari 2013. Perintah ini telah mewajibkan kanak-kanak Islam yang berumur tujuh tahun ke atas sehingga umur lima belas tahun yang menduduki di negara ini

untuk didaftarkan dalam pendidikan agama di peringkat prasekolah dan sekolah rendah. Dengan perintah ini maka diharapkan tiada akan ada kanak-kanak Islam yang tercicir dari memahami ilmu asas pendidikan Islam, tidak pandai mengerjakan sembahyang dan membaca al-Quran (Siti Sara Haji Ahmad, 2021). Pendidikan Islam bukan hanya diterapkan di sekolah agama tetapi juga dalam pendidikan umum sebagai satu mata pelajaran. Bahkan, mata pelajaran Melayu Islam Beraja juga diajarkan di sekolah-sekolah seluruh negara dari peringkat rendah sehingga di peringkat universiti.

Selain itu, baginda juga turut melartakan penubuhan sekolah persediaan dan Menengah Arab yang bukan sahaja tertumpu di Daerah Brunei dan Muara, bahkan ia juga turut dibangunkan di daerah-daerah lain. Penubuhan sekolah persediaan dan menengah Arab ini juga merupakan satu komitmen Kebawah Duli Yang Maha Mulia agar para pelajar dapat menimba ilmu pengetahuan asas berhubung Islam serta menguasai bahasa Arab. Dengan penguasaan Bahasa Arab yang baik dalam kalangan pelajar, ia boleh menjadi jambatan mudah untuk menguasai ilmu-ilmu Islam ke peringkat lebih mahir dan menjadi pakar. Sumber tenaga manusia seperti ini bukan saja mensepadukan antara pemerintahan beraja dengan nilai Melayu dan Islam tetapi menyumbang dalam mengukuhkan dan mempertahankan falsafah Melayu Islam Beraja (Dk. Norafidah et.al, 2024).

Kesepaduan antara pemerintahan beraja dengan Melayu dan Islam di bawah kuasa Kebawah Duli Yang Maha apabila baginda mengembangluaskan pendidikan Islam yang tidak hanya terhad di peringkat rendah dan menengah sahaja, tetapi ia juga berkesinambungan hingga ke peringkat

institusi pengajian tinggi. Ini dapatlah dilihat apabila Maktab Perguruan Ugama Seri Begawan (MPUSB) ditubuhkan pada tahun 1972. Maktab ini, antaranya berperanan dalam memberikan latihan dan melahirkan guru-guru agama yang berkelayakan dan terlatih. Sungguhpun salah satu tujuan maktab ini mendukung Perlembagaan Negeri Brunei dan sekaligus mencorak satu rupa bangsa yang mempunyai agama Islam sebagai asas masyarakat mengikut aliran masa, tanpa disedari juga telah mengukuhkan pegangan falsafah Melayu Islam Beraja (*Laporan Tahunan 1986-1995*, t.th). Pada tahun 2006 ia kemudiannya dinaiktaraf menjadi Kolej Universiti Perguruan Ugama Seri Begawan (KUPU SB). Sejak tahun 2007, kolej ini memberi peluang kepada para pelajar untuk meneruskan pengajian pendidikan agama di peringkat yang lebih tinggi dari peringkat Sijil, Diploma sehingga Sarjana. Pada tahun 2013, baharulah program ijazah Doktor Falsafah diperkenalkan (Dk. Norafidah et.al, 2024).

Pada 1 Januari 2007, Kebawah Duli Yang Maha Mulia juga memperkenankan penubuhan Universiti Islam Sultan Sharif Ali (UNISSA). Penubuhan universiti ini sekaligus menjadikannya sebagai universiti Islam pertama di negara ini. Universiti ini diharapkan akan menjadi mercu tanda kegemilangan Islam di negara ini dan juga mampu melahirkan para ulama dan cendikiawan yang berwibawa yang diperlukan oleh negara ini (Siti Sara Haji Ahmad, 2021). Jelaslah langkah Kebawah Duli Yang Maha Mulia membangunkan pendidikan Islam Brunei dari peringkat sekolah rendah hingga ke peringkat pengajian tinggi tidak hanya untuk menyemai dan melahirkan generasi yang berilmu, bertakwa dan berakhlak mulia tetapi dalam masa yang sama telah mengukuhkan pegangan falsafah Melayu Islam Beraja dalam kalangan generasi muda bakal pemimpin masa depan negara.



## 7. KESIMPULAN

Dalam menelusuri sejarah kelahiran dan perkembangan falsafah Melayu Islam Beraja Brunei ini ternyata ia bukanlah suatu perkara yang baharu, bahkan kewujudannya dapat dikesan sejak abad ke-14 Masihi lagi. Ini susulan pengislaman Awang Alak Betatar. Sejak itu falsafah Melayu Islam Beraja telah menjadi cara hidup orang-orang Brunei yang kemudiannya diwarisi secara turun temurun dan masih terus kekal relevan, diamalkan dan dihayati sehingga era pemerintahan Kebawah Duli Yang Maha Mulia. Sultan-sultan yang memerintah Brunei ternyata banyak menyumbang dalam menyatukan nilai-nilai Melayu dan Islam yang tercerna dalam komponen dalam falsafah Melayu Islam Beraja. Bermula dari Sultan Muhammad Shah yang merupakan pengasas kepada falsafah Melayu Islam Beraja Brunei, konsep kesepaduan antara pemerintahan beraja dengan Melayu dan Islam, diteruskan oleh sultan-sultan selepas era pemerintahan baginda. Menyatuan ini semakin jelas dengan kehadiran Sultan Sharif Ali. Di zaman pemerintahan baginda, Melayu dan Islam bukan hanya kukuh dengan usaha penyebaran Islam yang dilakukan oleh baginda, tetapi juga dengan perlaksanaan Undang-undang Islam. Kesepaduan beraja Brunei dengan Melayu dan Islam telah menempa era kegemilangannya apabila Negara Brunei Darussalam di bawah pemerintahan Sultan Bolkiah dan Sultan Muhammad Hasan. Perluasan wilayah melalui dasar penaklukan memberi kelebihan kepada pemerintahan beraja Brunei untuk menyebarkan pengaruh Islam ke negeri-negeri yang ditaklukinya. Apabila memasuki era pemerintahan Sultan Saiful Rijal, kesepaduan beraja Brunei dengan Melayu dan Islam dapat diselamatkan daripada ancaman kuasa Sepanyol yang sebelumnya menggugat pegangan akidah Islam di negara ini dengan penyebaran agama Kristian. Sungguhpun kesepaduan beraja Brunei dengan Melayu dan Islam mengalami kemerosotan pada abad ke-19, namun ia bangkit semula apabila pucuk kepimpinan negara disandang oleh Sultan

Omar Ali Saifuddien Sa'adul Khairi Waddien. Kesepaduan ini telah dapat dikukuhkan apabila baginda memeteri Perlembagaan Negeri Brunei 1959. Melalui perlembagaan ini kuasa dalam negeri telah dikuasai yang membolehkan baginda mengukuhkan kesepaduan sistem beraja dengan Melayu Islam. Usaha baginda ini kemudiannya diteruskan oleh anakanda baginda, Kebawah Duli Yang Maha Paduka Seri Baginda Sultan Haji Hassanal Bolkiah Mu'izzaddin Waddaulah. Baginda telah banyak berjasa dalam menyatukan sistem beraja Brunei dengan Melayu dan Islam. Ini bukan hanya dengan pengisytiharaan falsafah ini sebagai tunggal bernegara dan berbangsa negara pada tahun 1984, tetapi juga meneruskan sistem pemerintahan beraja mutlak di mana sultan adalah kuasa tinggi dan berdaulat kepada Negara Brunei Darussalam. Sementara itu menteri-menteri kabinet hampir keseluruhnya berbangsa Melayu Islam. Dengan kuasa yang ada di tangan baginda, kesepaduan dengan Melayu dan Islam dapat dilakukan dengan pembentukan Undang-undang Islam apabila baginda melaksanakan Perintah Kanun Jenayah Syariah 2013. Begitu juga peranan baginda dalam menubuhkan perbankan Islam dan kewangan Islam serta membangun pendidikan Islam dari peringkat rendah hingga ke universiti turut menyumbang kepada kesepaduan yang kukuh antara pemerintahan beraja dengan Melayu dan Islam. Selain perkara ini adalah lagi sumbangan Kebawah Duli Yang Maha Mulia dalam menyatukan sistem beraja dengan Melayu dan Islam, antaranya dasar-dasar kebajikan, keselamatan dalam dan luar negeri, membangun jaringan perhubungan darat, laut dan udara bagi memudahkan pergerakan rakyat dan mengukuhkan institusi dakwah dan masjid.

Kesepaduan antara sistem beraja dengan Melayu dan Islam ini telah banyak menyumbang kepada keamanan, keharmonian dan juga kesejahteraan rakyat di negara ini. Oleh sebab itu, kesepaduan ini tidak boleh dipisahkan dalam kehidupan bernegara dan berbangsa di Negara

Brunei Darussalam. Namun untuk jangka masa yang akan datang, adalah masih tidak diketahui apakah bentuk cabaran yang akan dilalui oleh kesepaduan ini. Terutama dengan kemunculan pengaruh globalisasi dan teknologi digital yang telah mempengaruhi corak kehidupan masyarakat dunia hingga kini. Kewujudan pengaruh ini memang perlu dialu-alukan oleh rakyat Brunei sesuai dengan peredaran zaman. Walau bagaimanapun, pengaruh ini tidak semestinya menjurus ke arah kebaikan, bahkan adakalanya terdapat juga unsur-unsur yang bercanggah dengan maksud dan hasrat kesepaduan sistem beraja dengan Melayu dan Islam. Ini boleh meninggalkan pengaruh negatif kepada semua lapisan masyarakat, khususnya kepada generasi muda. Mereka inilah yang akan menjadi pelapis dalam memelihara dan mengukuhkan kesepaduan ini. Bagi menghadapi cabaran ini, makanya kesepaduan ini perlulah diperkukuhkan sebagai benteng dan pertahanan yang dapat melindungi masyarakat daripada dipengaruhi oleh gejala-gejala negatif. Ia juga dapat memastikan negara ini sentiasa berada di landasan yang betul dalam menuju kesejahteraan dan kemajuan yang bukan hanya ke arah kehidupan keduniaan, tetapi juga akhirat.

## BIBLIOGRAFI

### BUKU

Asbol Mail, Ampuan Haji Ibrahim Ampuan Haji Tengah, Nani Suryani Haji Abu Bakar, Hajah Asiyah Az Zahra Haji Ahmad Kumpoh & Haji Tassim Haji Abu Bakar. (2019). *The Malay Islamic Monarchy in Negara Brunei Darussalam Prior to 1906: A Historical Studies*. Bandar Seri Begawan: Brunei Historical Society.

Asbol Mail dan Dr Haji Ramlee Haji Tinkong. 2023. Warisan Melayu Islam Beraja Brunei: Pengukuhan Islam, Kesenambungan dan Cabaran. Bandar Seri Begawan: Majlis Tertinggi Melayu Islam Beraja dan Akademi Pengajian Brunei, Universiti Brunei Darussalam.

Dato Seri Maharaja Dato Paduka Seri Setia (Dr.) Ustaz Haji Awang Abdul Aziz bin Juned 1992. *Islam Di Brunei: Zaman Pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan Dan Yang Di-Pertuan Negara Brunei Darussalam*. Bandar Seri Begawan: Jabatan Pusat Sejarah.

\_\_\_\_\_. 2020. *COVID-19 Apa Kata Mufti? (Siri 2 & 3)*. Bandar Seri Begawan: Jabatan Mufti Kerajaan.

Dato Seri Setia Awang Haji Abdul Hamid Mohd Daud. 2014. *Perkembangan Persekolahan Agama Di Negara Brunei Darussalam Dari Tahun 1956-1984 Masihi* (Edisi Kedua). Bandar Seri Begawan: Dewan Bahasa dan Pustaka.

Dr Haji Tassim bin Haji Abu Bakar. 2015. *Projeksi Melayu Islam Beraja dalam Media Massa*. Bandar Seri Begawan: Akademi Pengajian Brunei, Universiti Brunei Darussalam.

Dayangku Norafidah binti Pengiran Mohd Shamri, Asbol Mail, Profesor Ampuan Dr Haji Ibrahim bin Ampuan Haji Tengah dan Dr Haji Tassim bin Haji Abu Bakar. *Rancangan Kemajuan Negara Brunei Darussalam (1967-2017): Sejarah Pendidikan, Kesihatan dan Perumahan*. Bandar Seri Begawan: Persatuan Sejarah Brunei.

*Laporan Tahunan 1986-1995*. (t.th.). Negara Brunei Darussalam: Kementerian Hal Ehwal Ugama.

Muhammad Hadi Muhammad Melayong. (2021). *Melayu Islam Beraja: Amanat 1984*. Bandar Seri Begawan: Persatuan Sejarah Brunei.

Pehin Orang Kaya Amar Diraja Dato Seri Utama (Dr.) Haji Awang Mohd. Jamil al-Sufri. 1992. *Liku-liku Perjuangan Pencapaian Kemerdekaan Negara Brunei Darussalam*. Bandar Seri Begawan: Dewan Bahasa dan Pustaka.

\_\_\_\_\_. 1997. *Tarsilah Brunei: Zaman Kegemilangan dan Kemasyhuran*. Bandar Seri Begawan: Jabatan Pusat Sejarah.

\_\_\_\_\_. 2016. *Legasi Payung Negara: Aspirasi, Cita-Cita dan Hasrat Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam*. Bandar Seri Begawan: Pusat Sejarah Brunei.

Pehin Udana Khatib Dato Paduka Seri Ustaz Haji Awang Badaruddin bin Pengarah Dato Paduka Haji Othman. 2022. *Pemerintahan Negara Brunei Darussalam Menurut Ajaran Ahli Sunnah Wal Jamma'ah*. Bandar Seri Begawan: Pusat Dakwah Islamiah.

Yusop bin Haji Awang Damit, Asbol Mail dan Ampuan Dr. Hj Brahim bin Ampuan Hj Tengah. 2014. *Evolusi dan Transformasi: Kecemerlangan 100 Tahun Pendidikan Negara Brunei Darussalam 1914-2014*. Bandar Seri Begawan: Kementerian Pendidikan.

## ARTIKEL & KERTAS KERJA

Asbol Mail. 2012. Sejarah Pembentukan dan Perkembangan Melayu Islam Beraja Negara Brunei Darussalam Sejak TM 860. Dlm Haji Awang Asbol Haji Mail, *Sejarah & Persejarahan Brunei Dinamika Pembentukan & Transformasi* (351-392). Bandar Seri Begawan: Pusat Sejarah Brunei.

\_\_\_\_\_. 2018. Yayasan Sultan Haji Hassanal Bolkiah dan Rancangan Perumahan (1992-2016): Raja Berjiwa Rakyat. Dlm Haji Awang Asbol Haji Mail, Ampuan Haji Brahim Ampuan Haji Tengah, Haji Awang Mohamad Yusop Haji Awang Damit dan Awang Haji Rosli Haji Ampal (Eds.), *Kegemilangan Pemerintahan Kumpulan Artikel Sempena Jubli Emas Pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam (1967-2017)* (299-321). Bandar Seri Begawan: Yayasan Sultan Haji Hassanal Bolkiah.

Awang Haji Mohd Roselan Haji Daud. 2004. "Perbankan dan Kewangan Islam di Negara Brunei Darussalam." *Seminar Hari Kebangsaan Tema Patriotisme Teras Keteguhan Negara '20 Tahun Merdeka: Pencapaian dan Hala Tuju*, 1-15. Bandar Seri Begawan: Jawatankuasa Tertinggi Sambutan Hari Kebangsaan Ke-20, Pusat Sejarah Brunei & Persatuan Sejarah Brunei.

Hajah Hanan Haji Awang Abdul Aziz. (2018). Syariah Penal Code Order, 2013: His Majesty Sultan Haji Hassanal Bolkiah the Complement. Dlm Haji Awang Asbol Haji Mail, Ampuan Haji Brahim Ampuan Haji Tengah, Haji Awang Mohamad Yusop Haji Awang Damit & Awang Haji Rosli Haji Ampal (Eds.), *Kegemilangan Pemerintahan Kumpulan Artikel Sempena Jubli Emas Pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam (1967-2017)* (151-183). Bandar Seri Begawan: Yayasan Sultan Haji Hassanal Bolkiah.

Hajah Umami Fa'izah binti Haji Abdul Rahman. 2020. Pelaksanaan "Negara Zikir" Di Negara Brunei Darussalam. Dlm *Persidangan Antarabangsa Sains Sosial dan Kemanusiaan ke-5 (PASAK5 2020)*, 621-633. Selangor: Pusat Pengajian Tinggi Teras, Kolej Universiti Islam Antarabangsa Selangor (KUIS).

Hajah Zainon Hj Mohd Tahir. 2016. Perintah Kanun Hukuman Jenayah Syar'iah: Sejarah dan Perkembangannya. *Beriga* 117 (18-39). Bandar Seri Begawan: Dewan Bahasa dan Pustaka.

Muhammed Sahrin Haji Masri. (2021). Sumbangan Sultan-Sultan Brunei Dalam Pentadbiran Negara Zikir. Dlm Siti Sara Haji Ahmad (Ed.), *Ensiklopedia Negara Zikir Jilid 4L Sumbangan Sultan-Sultan Brunei dalam Penyebaran & Perkembangan Negara Zikir* (119-139). Bandar Seri Begawan: Unissa Press.

Pehin Siraja Khatib Dato Paduka Seri Setia Dr Ustaz Haji Yahya Haji Ibrahim. 2016. Perkembangan Undang-Undang Syariah Hingga 2013 Satu Tinjauan Ringkas. Dlm Haji Awang Asbol Haji Mail, Haji Awang Mohd. Yusop Haji Awang Damit & Awang Haji Rosli Haji Ampal (Eds.), *Brunei Merdeka Kumpulan Artikel Sempena Memperingati Sambutan 30 Tahun Hrai Kebangsaan Negara Brunei Darussalam* (151-163). Bandar Seri Begawan: Yayasan Sultan Haji Hassanal Bolkiah.

Pengiran Dato Seri Setia Dr Haji Mohammad Pengiran Abd. Rahman. 2018. Zaman Kegemilangan Pemerintahan Sultan Haji Hassanal Bolkiah (1967-2017): Aspek Keagamaan. Dlm Haji Awang Asbol Haji Mail, Ampuan Haji Brahim Ampuan Haji Tengah, Haji Awang Mohamad Yusop Haji Awang Damit & Awang Haji Rosli Haji Ampal (Eds.), *Kegemilangan Pemerintahan Kumpulan Artikel Sempena Jubli Emas Pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darusalam (1967-2017)* (121-150). Bandar Seri Begawan: Yayasan Sultan Haji Hassanal Bolkiah.

Siti Sara Haji Ahmad. 2021. Sumbangan Sultan-Sultan Brunei Dalam Sosio-Budaya Negara Zikir. Dlm Siti Sara Haji Ahmad (Ed.), *Ensiklopedia Negara Zikir Jilid 4L Sumbangan Sultan-Sultan Brunei dalam Penyebaran & Perkembangan Negara Zikir* (184-232). Bandar Seri Begawan: Unissa Press.

## AKHBAR

Abdullah Asgar. 2017. ‘Akta Perintah Kanun Hukuman Jenayah Syariah’ *Pelita Brunei, Kompilasi Rencana Khas 50 Tahun Kebawah Duli Yang Maha Mulia Menaiki Takhta*. Bandar Seri Begawan: Jabatan Penerangan.

Kita Wajib Laksanakan Undang-Undang Syariah, 15 Oktober 2011. *Pelita Brunei*.

Pengiran Hajah Fatimah Pengiran Haji Mohd Noor. 2017. ‘Melestarikan Pembangunan Masjid’ *Pelita Brunei, Kompilasi Rencana Khas 50 Tahun Kebawah Duli Yang Maha Mulia Menaiki Takhta*. Bandar Seri Begawan: Jabatan Penerangan.

## FORUM PERDANA

Izzul Ikhwan. 9 Jun 2014. *Forum Perdana Kelantan bertajuk “Mengapa Hudud?” pada 8 Jun 2014*. Ahli panel terdiri dari Nik Mohd Ammar Nik Abdullah, Khairuddin Aman Razali dan Mohd Asri Zainul Abidin [Video]. Youtube. Diakses pada 20 Oktober 2022 dari <https://www.youtube.com/watch?v=p8c0uc9fJtc>

## LAMAN SESAWANG

“*Hukum Hudud di Brunei Darussalam.*” (t.th.). Diakses pada 13 November 2022 dari [https://www.reddit.com/r/Brunei/comment/afrqpy/rember\\_this\\_thing\\_that\\_spread\\_wildly\\_in/](https://www.reddit.com/r/Brunei/comment/afrqpy/rember_this_thing_that_spread_wildly_in/)  
Jabatan Mufti Kerajaan (t.th.). *Penubuhan*. Diakses pada 15 Oktober 2022 dari <https://www.mufti.gov.bn/SitePages/Penubuhan.aspx>

World Population Review. (t.th.). *Rape Statistics by Country*. Diakses pada 20 Oktober 2022 dari laman <https://worldpopulationreview.com/country-rankings/rape-statistics-by-country>



## ABSTRAK

### KONSEP KESEPADUAN PEMERINTAHAN BERAJA BRUNEI DENGAN MELAYU DAN ISLAM

Asbol Mail  
Fakulti Sastera dan Sains Sosial /  
Akademi pengajian Brunei  
Universiti Brunei Darussalam  
Negara Brunei Darussalam

Makalah ini cuba menganalisis konsep kesepaduan beraja Brunei dengan nilai-nilai Melayu dan Islam dengan menumpukan perbincangan kepada aspek-aspek penyebaran Islam, undang-undang Islam, membina masjid, Perlembagaan 1959, sistem pemerintahan, pendidikan, dasar kebajikan dan adat istiadat. Semua ini telah dilakukan oleh sultan-sultan Brunei sejak pemerintahan Sultan Muhammad Shah (1363-1402) hingga ke era pemerintahan Kebawah Duli Yang Maha Paduka Seri Baginda Sultan Haji Hassanah Bolkiah Mu'izzaddin Waddaulah. Di zaman pemerintahan Kebawah Duli Yang Maha Mulia telah banyak dilakukan untuk merealisasikan konsep kesepaduan antara sistem beraja dengan nilai-nilai Melayu dan Islam. Baginda telah banyak berjasa dalam menegakkan falsafah Melayu Islam Beraja menerusi kesepaduan beraja dengan Melayu dan Islam. Ini bukan hanya dengan pengisytiharan falsafah ini pada tahun 1984 ketika pencapaian kemerdekaan, tetapi juga meneruskan sistem pemerintahan beraja mutlak yang mendudukkan baginda sebagai kuasa tertinggi dan berdaulat kepada Negara Brunei Darussalam. Dengan kuasa yang ada di tangan baginda kesepaduan beraja dengan Melayu dan Islam. Hal ini jelas dengan langkah mengangkat martabat Undang-undang Islam dengan pelaksanaan Perintah Kanun Jenayah Syariah 2013. Begitu juga peranan baginda dalam menubuhkan perbankan Islam dan kewangan Islam serta membangun pendidikan Islam dari peringkat rendah hingga ke universiti turut menyumbang dalam pengukuhan konsep kesepaduan beraja dengan Melayu dan Islam.

Kata kunci: Falsafah, Melayu, Islam, Beraja, Sultan, Undang-undang, pendidikan

